

Plate u pravosuđu ne bi smjele ugroziti funkcioniranje sudova

Visoki predstavnik, Paddy Ashdown, učestvovao je danas na Konferenciji o reformi u oblasti pravosuđa u Bosni i Hercegovini – trenutni status i budući izazovi, koju je organiziralo Visoko sudska i tužilačko vijeće BiH (HJPC).

Visoki predstavnik je na konferenciji naveo niz postignuća OHR-a u oblasti pravosudne reforme, kao što su uspostavljanje Državnog suda i Specijalnog vijeća za organizirani kriminal i korupciju pri ovom sudu, predstojeće uspostavljanje Odjela za ratne zločine pri Državnom sudu i restrukturiranje tužilaštava.

Visoki predstavnik je također ukazao na buduće izazove u oblasti pravosudne reforme, usredotočujući pažnju na pitanje finansiranja pravosuđa i plate u pravosuđu. Istaknuo je činjenicu da je njegov prethodnik povećao plate sudija i tužilaca kako bi ih zaštitio od mogućeg podmićivanja, ali da su se ta povećanja plata od tada nastavila i to u iznosima koji se ne mogu priuštiti. «Plate sudija i tužilaca su se nastavile povećavati za 10% godišnje – što ukupno iznosi 40% u četiri godine! A ovo se dešava u vrijeme kada nema adekvatnih finansijskih sredstava za sudove i tužilaštva, » izjavio je visoki predstavnik.

Visoki predstavnik je naglasio da trenutno 84% ukupnog budžeta odlazi za troškove ličnih dohodaka – plate i doprinose. Samo 16% budžeta preostaje za ostale tekuće troškove – kao što su troškovi električne energije, grijanja, telefona. «Mnogi sudovi u oba entiteta ne mogu nastaviti sa sudskim procesima zbog nemogućnosti plaćanja potrebnih vještaka zbog nedostatka adekvatnih finansijskih sredstava. Više od 70% sudova u RS se

suočavaju sa isključenjem telefonskih ili internet linija,» rekao je visoki predstavnik. «Jasno je da ovakav kontinuiran rast plata nije održiv i da se odmah mora zaustaviti».

Kako bi se stvorila finansijski održiva budžetska situacija u pravosuđu, visoki predstavnik je rekao da plate u određenim sudskim instancama moraju biti smanjene i do 16% u Federaciji, a do 4% u Republici Srpskoj. Takva mjera bi smanjila kadrovske troškove na iznos od približno 70%, što je u skladu sa evropskim standardima, izjavio je visoki predstavnik. «Ovo će omogućiti pravosuđu da funkcionira efikasnije i usredotoči se na provođenje pravde, » konstatirao je visoki predstavnik.

Plate u pravosuđu nisu jednake. Trenutno se prosječne neto plate u ovisnosti od stepena suda i pojedinačnog radnog staža kreću od 2500 do 4000 KM mjesечно. Predložena smanjenja će ovisiti o plati koja se trenutno prima.